

INUIT ATAQATIGIIT INATSIARTUNI



UPA2026/46

12. maj 2026

Nivi Heilmann Efraimsen

Uunga siunnersuut: Sanaartornermi neqerooruteqartitsisarneq pillugu Inatsisartut inatsisaata allangortinneqarnera aamma pisortat oqartussaaffigisaanni suliffeqarfiinilu nioqqutissanik kiffartuussinernillu pisiniarnermut tunngatillugu neqerooruteqartitsisarneq pillugu Inatsisartut inatsisaata allangortinneqarnera pillugit Inatsisartut inatsisaat

(Ineqarnermut, Attaveqarnermut, Isorliunerusunut Upalungaarsimanermullu Naalakkersuisoq)

Oqaaseqaat

Pisortat sanaartugassanut suliassaataasa pisariitsumik ingerlanneqartarnerat kisimi pinnani, aammali inuiaqatigiit ineriartornerannut ilapittuisinnaanerat Inuit Ataqatigiinnut pingaaruteqarpoq. Pisortat aningaasaataasa akisussaassusilimmik ersarissumillu atorineqartarnissaat, tamatuma kinguneraa - peqatigisaanillu piffinni inuussutissarsiornikkut ineriartornermut, suliffissaqartitsinermut, ilinniartitaanermut nunarpullu tamakkerlugu piginnaangorsarnermut ilapittuissapput.

Isiginiagassat taakkorpiaat Naalakkersuisut inatsisissatut siunnertuutaannut tunngaviupput, tamannalu Inuit Ataqatigiit tamakkiisumik tapersorsorpaat.

Inatsisissatut siunnersuut neqerooruteqartitsisarnermut inatsisip atuutilerneranit misilittagarilikkanik, Naalakkersuisullu ataatsimut malittarisassanik misissuinerinik aallaaveqarpoq. Inatsit immikkoortut ilaanni allaffissornikkut ima oqimaatsigilersimanera, allaat atuuffii nalornissutigineqalerlutik, malittarisassallu sutigut tamatigut sanaartornermik ingerlatsisuni piviusumik ersersitsinnginnera, misissuinerup takutippaa. Peqatigisaanik ingerlatsinermut, siunnersuinermut pilersuinernullu malittarisassat, malittarisassamut ataatsimut ataqatigiinnerusumut katersornissaat pisariaqartinneqarpoq.

Unammillernartitat taakku inatsisip nutarternertigut pitsaanerpaamik aaqqinneqarsinnaanerannik Naalakkersuisut naliliinerat, Inuit Ataqatigiit isumaqatigaat.

Siunnersuummi piviusorsiortuutillugu naapertuutsillugulu piffinni pissutsinik akuutitsinissaq, piffinnillu aallaaveqarnissamik periarfissaq pingaarutilittut ilaavoq.

INUIT ATAQATIGIIT INATSISSARTUNI



Naligiimmik pinninnissamut periutsip suli tunngaviusumik aallaaviunera, pissutsinili immikkut ittuni piffimmi suliffeqarnek, suliffissaqartitsineq inuiaqatigiillu akisussaanerisa isiginiarnissaata erseqqissarnissaa pingaaruteqarpoq. Inuit Ataqatigiinnut tamanna nunatsinni isorartuumi nunap immikkoortuini annertuumik assigiinngissutilimmi piffinnilu mikisunik niuerfeqartumi pisariaqartumik eqaatsuutitsineruvoq.

Peqatigisaanik inatsisissatut siunnersuutikkut suliariumannittussarsiuussinermi ersarissuuneq tutsuiginassuserlu nukittorsarneqarput, ilaatigut soqutigisat aporaaffeqarneranni passussineq pillugu malittarisassatigut kiisalu neqeroorteqartut annertuumik inatsisunik unioqquutitsisimasut, siusinnerusukkulluunniit isumaqatigiissutinik annertuumik sumiginnaasimasut ilaatinginnissaannut erseqqissunik periarfissiinikkut. Tamanna pissutsinut aaqqissukkanut naapertuilluartumillu unammilleqatigiinnermut tapertaaqataavoq.

Matoqqasumik neqeroortitsinermut malittarisassat nalimmassarneqarnissaat Inuit Ataqatigiit aamma pitsaasuutippaat, taamaaliornikkut unammilleqatigiinneq pilliuteqarfiginngikkaluarlugu allaffissornikkut eqaannerusumik iliuseqarsinnaaneq anguneqarsinnaaqullugu. Tamanut ammasumik suliariumannittussarsiornek suli periarfissaavoq, eqaatsumillu iliuseqarsinnaaneq akisussaassuseqartumik eqqarsarluarlunilu atorneqassaaq.

Naalakkersuisut siunissami ilinniartunut, praktikertunut isumaginninnikkullu isiginiagassanut piumasaqarsinnaanermut pitsaanerusumik periarfissaqalernissaat, Inuit Ataqatigiit pingaartutut isigaat. Tamanna ilinniartitaanermik piginnaanngorsaanermillu qulakkeerinninnissamut pingaarutilimmik sakkussaavoq – taamaalillunilu aamma Kalaallit Nunaata siunissami sulisussaanut aningaasaliinerulluni.

Inatsisissatut siunnersuut tamanut tusarniaassutigineqarpoq, Naalakkersuisullu akissutinik misissuinerisa ataatsimut isigalugu inatsisip siunnerfianut tapersiisoqartoq takutippaa. Oqaatigisat tiguneqartut tunngaviusumik siunnerfik allanngortinnagu, erseqqissaanernut inatsisissatullu siunnersuummik nukittorsaanermut ilapittuipput.

Ataatsimut isigalugu inatsisissatut siunnersuutip oqimaaqatigiissumik neqeroortitsisarnermik inatsimmik nutarterisuullunilu, piffimmi ineriartornermik, inuiaqatigiit akisussaaqataanerannik pisortallu allaffissornerisa eqaannerulernerannik imaqartoq, Inuit Ataqatigiit naliliipput.

Taamaammat Inuit Ataqatigiit inatsisissatut siunnersuut taperserpaat, ataatsimiitalimilu suleriaqqinnissamut qilanaarlutik.